

三
國
志
旁
證

三國志旁證卷十二

閩長樂梁章鉅撰

崔炎字季珪清河東武城人也少樸訥好擊劍尙武事年二十

三鄉移爲正

太平寰宇記卷五十八云史記平原君封東武城卽此蓋以

定襄有武城同屬趙故此加東也

晉去東字

沈欽韓曰漢官儀

民年二十三爲正

謂正卒

一歲以爲衛士一歲爲材官騎士習

射御騎馳戰陣年五十六老衰乃得免爲民蓋爲文學弟子則復其身

至年二十九乃就鄭元受學學未暮徐州黃巾賊攻破北海元與門人到不其山避難

藝文類聚卷二十七引崔炎述初賦云炎性頑口訥至二十

九粗閱書傳聞北海有鄭徵君者當世名儒遂往造焉道由齊都而作述初賦曰有鄭氏之高訓吾將往乎發矇灑余髮於蘭池振余珮於清風望高密以亟征戾衡門而造止覲遊夏之峩峩聽大猷之篇記 潘眉曰其如淳音基續漢志作不期山三齊記云鄭元教授不期山山下生草土人名康成書帶 顧祖禹曰不其山在萊州卽墨縣東南四十里於是周旋青徐兗豫之郊

太平寰宇記卷二十引郡國記云昌陽縣有巨神島有神能興雲雨崔炎避黃巾賊於此山

唯世子燔翳捐褶以塞衆望

錢大昭曰晉書輿服志云袴褶之制未詳所起近世凡車駕親戎中外戒嚴服之

虬鬚直視若有所瞋遂賜炎死

史通暗惑篇云魏志注引語林云匈奴遣人來朝太祖太祖令崔炎在坐而已捉刀侍立旣而使人問匈奴使者曰曹公何如對曰曹公美則美矣而侍立者非人臣之相太祖乃追殺使者難曰昔孟陽臥牀詐稱齊后紀信乘纛矯號漢皇或主遘屯蒙或朝羅兵革故權以取濟事非獲已崔炎本無此急何得以臣代君且凡稱人君皆慎其舉措況魏武經綸霸業南面受朝而使臣居君坐君處臣位將何以使萬國具瞻百寮僉囑也又漢代之於匈奴其爲綏撫勤矣雖復賂以金帛結以姻親猶恐虺毒不悛狼心易擾如輒殺其使者不顯罪名何以懷四夷於外藩建五利於中國且曹公必以所爲過失懼招物議誅彼行人將以杜茲謗口而言同綸綍聲徧

褒區欲蓋而彰止益其辱雖愚暗之主猶所不爲況英畧之君豈其若是而裴引語林斯事編入魏史注中持彼虛詞亂茲實錄故特申掎摭辨其疑誤焉 按此事裴注並未採入不知劉氏所云何謂也

注人得炎書以裹幘籠持其籠行都道中

殿本考證云宋本無持其籠三字毛本都作部

注山陽張儉以中正爲中常侍侯覽所忿疾覽爲刊章下州郡捕儉儉與融兄褒有舊亡投褒遇褒出時融年十六

潘眉曰考侯覽捕張儉事在建甯二年融建安十三年見殺年五十六則建甯二年已十七歲

又司徒大司馬辟舉高第

趙一清曰大司馬一本作大將軍蓋何進也融傳辟司徒楊

賜府河南尹何進當還爲大將軍賜遣融奉謁賀

又郡人甄子然孝行知名 又太祖外雖寬容而內不能平

殿本考證云宋本甄作鄭寬容下有之字

又融對孫權使有訕謗之言坐棄市二子年八歲

後漢書本傳云女子年七歲男子年九歲 潘眉曰此引魏

氏春秋但言二子不分言男女又二子不得同是八歲當以

後漢書爲是

注後坐藏亡命被繫當死

殿本考證云監本譌藏作賊今改正

注世語曰炎兄孫諒字士文 又荀綽荊州記諒卽炎之孫也

按二說已不同而唐書宰相世系表作炎生諒字士文又以諒爲炎子益不可考

毛玠傳 務以儉率人由是天下之士莫不以廉節自勵雖貴寵之臣輿服不敢過度

太平御覽卷二百十四引傅咸集表云昔毛玠爲吏部尙書無敢好衣美食者魏武歎曰孤之法不如毛尙書今使吏部用心如毛玠風俗之易蓋不難矣

文帝爲五官將親自詣玠屬所親眷玠答曰老臣以能守職幸得免戾

按此與崔炎傳老臣獲罪於天並先稱臣於操丕之前或曰此史之駁文然春秋時仕於大夫之家者皆曰臣漢代公卿郡守之屬吏掾史亦多稱臣非必與操已定君臣之分也

遂省西曹

後漢書百官志云西曹主府史署用東曹主二千石遷除及

軍吏

徐奕傳東莞人也

一統志云東莞故城今沂州府沂水縣治 潘眉曰本郡琅

邪國也

注詔以其族子統爲郎

錢大昭曰郎下脫中字見文帝紀

何夔傳陳郡陽夏人也

元和郡縣志云陳州太康縣理城卽漢陽夏縣城夏后太康

所築

注音動左右和帝佳之

殿本考證云一本作和帝偉之

蘄陽爲太祖固守術以夔被郡人欲脅令說蘄陽

趙一清曰蘄陽漢沛國之蘄縣也而陳承祚述史屢有蘄陽之文豈後漢末曾改蘄縣爲蘄陽乎又夔是陳郡人今云以夔彼郡人所未達也或郡人下有缺文

遷長廣太守郡濱山海

錢大昭曰郡國志長廣屬東萊郡晉地理志宋州郡志皆有長廣郡竝言咸甯三年置晉志領不其長廣挺三縣宋志領四縣三縣之外又有昌陽也今讀此傳乃知建安初已有此郡不知有自何時而咸甯中復置諸史並未志其沿革不已疏乎 顧祖禹曰長廣在萊陽縣東五十里

所領六縣

洪亮吉曰晉起居注云咸甯三年以齊東郡縣爲長廣郡領縣四不其長廣昌陽挺晉地理志亦同惟無昌陽而何夔傳

云領六縣有長廣牟平東牟昌陽其二縣當卽不其挺也魏末郡或旋廢至晉咸甯三年復置

封成陽亭侯

晉書何曾傳作陽武亭侯

注時毋邱儉孫女適劉氏以孕繫廷尉女母荀爲武衛將軍荀顗所表活旣免辭詣廷尉乞爲官婢以贖女命曾使主簿程咸爲議

晉書刑法志及何曾傳並云魏法犯大逆者誅及已出之女毋邱儉之誅其子甸妻荀氏應坐死其族兄顗族父虞與景帝姻通共表魏帝以甸其命詔聽離婚荀所生女芝爲潁川太守劉子元妻亦坐死以懷孕繫獄荀詣曾乞恩曾哀之騰辭上議 趙一清曰劉子元名仲武晉書禮志載沛國劉仲

武先娶母邱氏生子正舒正則二人母邱儉反敗仲武出其妻娶王氏生陶仲武爲母邱氏別舍而不告絕及母邱氏卒正舒求耐葬焉而陶不許舒不釋服訟於上下泣血露骨縗裳綴絡數十年不得從以至死亡所云懷孕卽正則也

又諡曰元公

晉書何曾傳云咸甯四年薨博士秦秀諡爲繆醜帝不從策諡曰孝太康末子劭自表改諡爲元

又傅子稱曾及荀顗曰以文王之道事其親者其穎昌何侯乎其荀侯乎古稱曾閔今日荀何

困學紀聞云何曾荀顗之孝論者比之曾閔夫以孝事君則忠不忠於魏又不忠於晉非孝也顗之罪浮於曾曾之驕奢禍止及家顗之姦諛禍及天下

邢昺河間鄭人也

顧祖禹曰莫州城在河間府任邱縣北三十里明州縣俱廢置鄭城驛於此

鮑勛泰山平陽人也

一統志云平陽故城在泰安府新泰縣西北

文帝將出游獵勛停車上疏

太平御覽卷四十二引魏畧云魏文帝獵北邙上時盛夏炎暑行者或中暍鮑勛切諫遂因此伏法按本傳勛因諫獵出爲右中郎將後以諫征吳左遷復緣私解孫邕事收付廷尉伏誅並非因諫獵伏法魏畧有脫漏故裴注不收也

宮正卽御史中丞也

宋書百官志云御史大夫有二丞其一曰御史丞其二曰御

史中丞殿中蘭臺祕書圖籍在焉而中丞居之外督部刺史
內領侍御史受公卿奏事舉劾案章中丞每月二十五日繞
行宮垣白壁史臣案後漢書百官志執金吾每月三繞行宮
城疑是省金吾以此事併中丞 趙一清曰宮正之名以巡
行宮省得名

司馬芝傳河內溫人也少爲諸生避亂荊州於魯陽山遇賊

顧祖禹曰溫縣故城在今懷慶府溫縣西南三十里 潘眉
曰山名魯山不名魯陽在魯山之陽邑因名魯陽此當云魯
陽魯山 按元和郡縣志魯山在汝州魯陽縣東北十里
太祖平荊州以芝爲管長

錢大昕曰管當作菅濟南有菅縣故下文有馳檄濟南之語
一統志云菅縣故城在濟南府章邱縣西北劉宋省

今條同等爲兵幸時發遣

殿本考證云北宋本條作調

歷甘陵沛陽平太守

錢大昭曰陽平郡黃初二年以魏郡東部置

會內官欲以事託芝

何焯曰會當作曹

管子區言以積穀爲急

潘眉曰區字當爲匡管子有大匡中匡小匡而無區言 沈

欽韓曰管子自任法第四十五至內業第四十九爲區言

子岐嗣從河南丞轉廷尉正

按前芝遷大理正此岐轉廷尉正大理漢官魏改爲廷尉實

一官也

南陽圭泰

錢大昭曰古未見有圭姓或是州泰之誤州泰南陽人見鄧艾傳後

鍾繇傳

字元常潁川長社人也

潘眉曰繇史記吳太伯世家東越傳正義音遙索隱音搖楊升庵謂鍾繇字元常者取臯陶陳謨彰厥有常之義是也今多以繇音由者蓋非晉世說庾公謂鍾會曰何以久望卿遙遙不至蓋舉其父諱以嘲之 顧祖禹曰長社故城在許州長葛縣西一里

注諸君終身何所任耶

殿本考證云監本作何所任也此係鍾皓曉語掾屬之詞似反詰語氣作耶字爲是今依別本改正

又生子覲 又覲辟州宰

後漢書鍾皓傳覲作瑾州宰作州府

又國武子好昭人過以爲怨本

殿本考證云國語昭作招音翹

又繇則迪之孫

潘眉曰迪爲皓之子繇爲迪之子此作迪之孫誤 按後漢書鍾皓傳明言繇是皓之孫注引海內先賢傳繇郡主簿迪之子可證

供給資費便得專學

世說文學篇注引魏志云繇家貧好學爲周易老子訓今志無此語

注至乃使邑遠詣闕廷隳忝使命

殿本考證云監本闕廷作關廷此指王邑佩印綬經從河北詣許自歸而言作關廷誤今依別本改正

又夫玉以比德君子見美詩人

文選作良玉比德君子珪璋見美詩人

又近見南陽宗惠叔

錢大昭曰疑卽宗承見荀攸傳注

又捧跪發匣

文選作捧匣跪發下有五內震駭繩窮匣開八字

詔謂太祖欲復肉刑此誠聖王之法

殿本考證云宋本太祖作大理按大理字非時繇已爲太傅不當仍稱大理此太祖之號或史家追改之文

夫五刑之屬著在科律科律自有減死一等之法

殿本考證云宋本無下科律二字 潘眉曰漢元帝初元五年輕殊刑三十四事哀帝建平元年盡四年輕殊死者刑八十一事其四十二事手殺人皆減死罪一等著爲常法

議者百餘人與朗同者多帝以吳蜀未平且寢

侯康曰博物志云肉刑明王之制荀卿每論之至漢文帝感太倉公女之言而廢之班固著論宜復迄漢末魏初陳紀又論宜申古制孔融云不可復魏武帝輔漢

二語據御覽六百四十八卷引博物

志補正 欲申之鍾繇王朗不同遂寢夏侯元李勝曹義丁謚建

私議各有彼此多云時未可復故遂寢焉按曹義肉刑論載藝文類聚夏侯元李勝丁謚諸論載通典類聚又載魏傳幹肉刑議疑亦是時預議者也又按魏議復肉刑凡三次鍾繇傳所載甚明此云議者百餘人與朗同者多則最後一

帝時事也至夏侯元李勝曹羲丁謐諸議據晉志則當正始時又不在此三次之內蓋是諸人私自著論非相朝議也博物志繫之武帝時語偶未晰耳傅幹爲傅燮子在漢末已爲扶風太守則其議當在前

謐曰成侯注詔曰太傅功高德茂位爲師保論行賜謐當先依此兼敘廷尉于張之德耳

按太祖紀詳述師宜官梁鵠之工書而元常書法妙絕古今傳中既不載注亦無一字及之何也

明帝欲西征毓上疏曰

殿本考證云太平御覽作欲親西征 陳浩曰毓疏皆係止帝親征之辭疑監本脫落親字

且盛暑行師詩人所重實非至尊動輒之時也

殿本考證云太平御覽動輒作順動

備設魚龍蔓延

按文選西京賦巨獸百尋是爲曼延曼不作蔓 沈欽韓曰漢書武紀注文穎曰巴渝戲魚龍蔓延之屬也亦作蔓

正始中爲散騎侍郎

盧明楷曰前云毓年十四爲散騎侍郎太和中已遷黃門侍郎矣此時安得又爲散騎侍郎胡昭傳云正始中散騎常侍荀顗鍾毓侍郎其常侍之誤與

後以失爽意徙侍中出爲魏郡太守

何焯曰徙當作徙侍中在常侍上不應忤爽而反得美遷當是解其近職出之外郡耳不書毓爲侍中於前史省文也及土爲侯其妻不復配嫁

殿本考證云太平御覽作不復改嫁

華歆傳

平原高唐人也高唐爲齊名都

洪亮吉曰高唐漢舊縣魏侯國

注

魏畧曰歆與北海邴原管甯俱游學三人相善時人號三人

爲一龍歆爲龍頭原爲龍腹甯爲龍尾

唐庚曰伏后之廢操使歆勒兵入宮收后至破戶發壁而入此豈盛德之士所爲哉操雖奸雄然使人各當其理是時魏氏羣臣如董昭夏侯惇賈詡程昱郭嘉之流皆足辦此何至使歆爲之歆果賢耶操亦不敢以此使之矣邴原傳稱少與管甯俱以操尙稱初不及歆則陳壽之意亦可見矣

注

華嶠譜敘曰歆少以高行顯名避西京之亂與同志鄭泰等六七人間步出武關道遇一丈夫獨行願得俱皆哀欲許之歆

獨曰不可今已在危險之中禍福患害義猶一也無故受人不知其義既以受之若有進退可中棄乎衆不忍卒與俱行此文夫中道墮井皆欲棄之歆曰己與俱矣棄之不義相率其還出之而後別去衆乃大義之

按世說德行篇云華歆王朗俱乘船避難有一人欲依附歆輒難之朗曰幸尙寬何爲不可後賊追至王欲舍所攜人歆曰本所以疑正爲此耳既已納其自託甯可以急相棄耶遂攜拯如初世以此定華王之優劣按此與譜敘所載當卽一事而傳聞小異耳

注魏書曰文帝受禪歆登壇相儀奉皇帝璽綬

殿本考證云璽綬北宋本作璽紱

又歆以形色忤時徒爲司徒而不進爵

姜宸英曰登壇相儀之人豈能嚴色忤時且譖出華氏子孫何足徵信又曰華歆一時名士晚節披猖至牽伏后出壁黨惡與弑知平時整暇與閨門振肅皆枝葉耳何焯曰此華嶠之飾辭歆不恥爲魏相國又何忤哉

公卿嘗並賜没入生口唯歆出而嫁之帝歎息

注

孫盛曰子路

私饋仲尼毀其食器田氏盜施春秋著以爲譏孥戮之家國刑所肅若在哀矜理無偏宥歆居股肱之任則當公言皇朝以彰天澤而默受嘉賜獨爲君子可謂匹夫之仁蹈道則未也

唐庚曰孫盛以刻薄之資承學於草竊亂賊之世性習皆惡故其論議類皆如此夫見牛未見羊孟子所謂仁術何名爲偏宥哉使盛爲廷尉於魏文之時則歆當以私饋盜施誅矣東晉之不用盛不爲過也

又歆乃自知當爲公

趙一清曰梁簡文大同哀辭曰華歆所聞之語已定北陵之期卽用此事但歆封博平而云北陵未詳

病乞退

藝文類聚卷四十六引齊職儀云太尉華歆以疾依田千秋故事乘輿上殿

表咸熙中爲尙書

注

表字偉容年二十餘爲散騎侍郎又事來

有不便輒與尙書共論盡其意

又

司空陳泰等以此稱之又司

徒李允司隸王密等常稱曰若此人者不可得而貴不可得而賤不可得而疏

陳景雲曰華表以咸熙中爲尙書則其官散騎侍郎當在文明之世是時陳羣爲司空泰之父也羣以司空錄尙書事凡

散騎奏議無不綜典故悉表之爲人而稱之耳雖諸書亦有緣泰之贈官而稱司空者然當表爲散騎時泰方名微位卑朝士似不假其品藻爲重也泰當作羣王密當從晉書表傳作王宏宏弼之兄也別見鍾會傳注按魏志陳羣傳文帝踐阼遷尙書僕射徙尙書令明帝卽位爲司空又陳泰傳青龍中除散騎侍郎正始中徙游擊將軍嘉平初爲雍州刺史後徵爲尙書右僕射吳將孫峻出淮泗以泰爲鎮東將軍峻退還轉左僕射景元初追贈司空足爲泰當作羣之證又案晉書華表傳司徒李允司隸王宏並歎美表清淡退靜以爲不可得貴賤而親疏鍾會傳注王業子宏字正宗司隸校尉弼之兄也並足證密當作宏 潘眉曰不可得而賤句下當脫不可得而親五字晉書華表傳以爲不可得貴賤而親疏也

又表有三子長子廙字長駿又嶠字叔駿又澹字元駿

晉書華表傳云有六子此惟舉廙嶠澹而不及岑鑒簡

又廙有文翰

晉書華廙傳云廙宏敏有才義妻父盧毓典選難舉姻親故廙年三十五不得調晚爲中書通事郎泰始初遷冗從僕射少爲武帝所禮厯黃門侍郎散騎常侍前軍將軍侍中南中郎將都督河北諸軍事免官棲遲家巷垂十載教誨子孫講誦經典集經書要事名曰善文行於世

又嶠有才學撰後漢書世稱爲良史

晉書華嶠傳云嶠以漢紀煩穢慨然有改作之意會爲臺郎典官制事由是得徧觀祕籍遂就其緒起光武終孝獻百九十五年爲帝紀十二卷皇后紀二卷十典十卷傳七十卷及

三譜序傳目錄凡九十七卷嶠以皇后配天作合前史作外戚傳以繼末編非其義也故易爲皇后紀以次帝紀又改志爲典以有堯典故也而改名爲漢後書奏之藏之祕府所撰十典未成而終祕書監何劭奏嶠中子徹爲佐著作郎使踵成之未竟而卒後監繆徽又奏嶠少子暢爲佐著作郎克成十典永嘉喪亂經籍遺沒嶠書存者五十餘卷

又虞三子昆字敬倫

晉書華廙傳昆作混疑誤

王朗東海郡人也

郡字誤 殿本考證云北宋本作東海郟人通志同是也

按世說德行篇注引魏書亦作東海郟人

注朗家傳曰

隋書經籍志有王明王肅家傳一卷

注獨與老母共乘一櫓流矢始交便棄櫓就俘

潘眉曰莊子秋水篇梁麗可以衝城司馬彪注梁麗小船也
櫓卽麗之俗字 沈欽韓曰方言東南丹楊會稽之間謂舡
爲櫓音禮集韵櫓通作櫓

注魏名臣奏載朗節省奏曰

隋書經籍志魏名臣奏事四十卷目一卷陳壽撰

又釀酎必貫三時而後成

盧明楷曰酎音宙說文曰三重醇酒也西京雜記漢制嘗以
正月作酒八月乃熟名曰酎所謂必貫三時而後成也各本
多誤作酎今 殿本已改正

又學官博士七十餘人

錢大昭曰博士下當有弟子二字

又中二千石蔽罪斷刑者二十有五獄

沈欽韓曰漢書杜周為廷尉詔獄益多逮至六七萬人吏所

增加十有餘萬西京詔獄之數有都司空獄實嬰上林獄被

說淮南王偽為上內官獄隆慮公主昭導官獄張湯所愛史

林中都官詔獄保官獄李陵降匈奴請室獄郡邸獄丙吉詔都舩獄丞

王嘉暴室獄趙昭儀取所產皇子若盧獄召詣掖廷夫東劉

輔致其工獄劉輔按郡邸之獄不止一邸又有三輔諸官署獄

統而計之殆不止二十五獄也

注王朗集載朗為大理時

隋書經籍志王朗集三十四卷

又饗膳近任當得此吏今以登為太官令

後漢書百官志太官令一人六百石掌御飲食

王肅傳年十八從宋忠讀太元而更爲之解

太平御覽卷六百五引顧野王輿地志云王朗爲會稽太守子肅隨在郡住東齋中夜有女從地出稱越王女與肅語曉別贈一丸墨肅方注周易因此才思開悟

可復五日視朝之儀使公卿尙書各以事進

何焯曰肅此奏欲漸革政歸臺閣之弊乃當日之急務又欲轉移無跡故但以復五日一朝之儀各以事進爲言蓋臨朝奏事面取裁決則尙書不得專執大柄可否任心矣

後肅以常侍領祕書監

太平御覽卷二百三十三載王肅表云青龍之末主者啟選祕書監詔祕書騶吏以上三百餘人非但學問義理當用有

威嚴能檢下者詔肅以常侍領焉

九龍可以安聖體

錢大昭曰九龍殿卽崇華殿也因災而改名

正始元年出爲廣平太守

錢大昭曰廣平郡黃初二年以魏郡西部置

嘉平六年持節兼太常奉法駕迎高貴鄉公子元城是歲白氣經天大將軍司馬景王問肅其故肅答曰此蚩尤之旗也

按晉書宣帝紀白氣經天在正始元年十一月此係之嘉平六年者蓋高貴鄉公以是年十月改元也 潘眉曰蚩尤之旗見天文志類彗而曲象旗見則王者征伐四方其太平御覽二十七所引皇覽塚墓記云蚩尤塚在東郡壽張縣闕城中人常以十月說云每有氣如匹絳自上屬下號曰蚩尤旗

此非肅所云也

咸熙中開建五等以肅著勳前朝改封恂爲承子

趙一清曰肅女適司馬文王故嗣爵無替又前漢志承屬東海郡應劭音證字本作承以承水所經而名今作承非也

注世語曰恂字子良大有通識又虔子康隆仕亦宦達

潘眉曰疑此子字衍大字是夫字之誤晉書恂字良夫其弟禮亦字君夫也 晉書王雅傳云雅王肅曾孫也祖隆然則隆亦肅子疑虔子之子字本是弟字

初肅善賈馬之學而不好鄭氏采會同異爲尙書詩論語三禮左氏解及撰定父朗所作易傳皆列於學官

隋書經籍志有王肅周易注十卷尙書注十一卷尙書議五卷毛詩注二十卷毛詩義駁八卷毛詩奏事一卷毛詩問難

二卷周官禮注十二卷儀禮注十七卷喪服經傳注一卷喪服要記注一卷禮記注三十卷禮記音一卷又撰祭法五卷明堂議三卷春秋左氏傳注三十卷春秋外傳章句一卷孝經解一卷論語注十卷論語釋駁三卷又孔子家語二十一卷王肅解

肅集聖證論以譏短元

隋書經籍志王肅撰聖證論十二卷王子正論十卷

叔然駁而釋之及作周易春秋例毛詩禮記春秋三傳國語爾雅諸注又注書十餘篇

隋書經籍志有孫炎注禮記三十卷爾雅七卷又有爾雅音二卷舊唐書元行沖傳云開元初魏光乘請用魏徵類禮上令行沖集學者撰義疏將立學官張說駁奏禮記歷代傳

習已向千年不可刊削至魏孫炎始改舊本以類相比有同鈔書先儒所非魏徵更加整比兼爲之注若欲行用竊恐未可上然其奏畱書內府

自魏初徵士燉煌周生烈

注

此人姓周生名烈

後漢有周生豐見馮衍傳注引風俗通云周生姓也羅泌

路史後紀云燉煌實錄魏侍中周生烈本姓唐外養周氏因爲姓亦見七錄及中經簿隋書經籍志周生子要論一卷錄一卷魏侍中周生烈撰案烈爲張旣辟舉見旣傳

注

宏農王卽阼旣淺又爲暴臣所制降在藩國不應謁

何焯曰宏農王雖未踰年然嘗北面事之則故君也董遇竟謂不應謁豈合理乎

又

又善爲左氏傳更爲作朱墨別異又由是諸生少從遇學無

傳其朱墨者

孔穎達春秋左氏傳序正義云中興以後陳元鄭衆賈逵馬融延篤彭仲博許惠卿服虔潁容之徒皆傳左氏春秋魏世則王肅董遇爲之注 趙一清曰春秋正義多引董遇本以正異同則其書唐時猶未亡也

又唯洪與馮翊嚴苞交通材學最高

殿本考證云嚴苞交通太平御覽作嚴苞字文通材學最高下多故衆爲之語曰州中煜煜賈叔業辨論洵洵嚴文通二十字

又薛夏字宣聲天水人也 又四姓欲共治之 又漢陽兒輩直欲殺之耳 又後數歲病亡勅其子無還天水

潘眉曰漢武帝置天水郡明帝永平十七年更名漢陽郡晉

復爲天水郡此郡前漢爲天水後漢爲漢陽魏亦爲漢陽晉復爲天水也薛夏漢末人當稱漢陽人魏畧以爲天水人據晉時郡名追改之然述太祖言則曰漢陽兒輩述其勅子則曰無還天水彼此歧說則判若兩地矣

王肅亮直多聞能析薪哉劉實以爲肅方於事上而好下佞已此一反也性嗜榮貴而不求苟合此二反也吝財惜物而治身不穢此三反也

陳景雲曰劉實語當是裴注如譙周傳評後註引張璠以爲云云與此正同肅旣名臣又晉武外王父史臣於本傳畧無貶辭豈應于評中反摭其短乎況陳評二句辭意已足其下不容更贅他語尤易了也

程昱傳

東郡東阿人也黃巾起縣丞王度反應之燒倉庫縣令踰

城走吏民負老幼東奔渠邱山

沈欽韓曰續志劉昭注於東阿縣下據此傳有渠邱山一
統志謂曲山卽渠邱山在泰安府東阿縣西北十五里
夫布麤中少親

沈欽韓曰韓非十過篇智伯之爲人麤中而少親
注據千里之齊

殿本考證云北宋本齊作地

孫權新在位未爲海內所憚

殿本考證云太平御覽引作孫權新立

昱性剛戾與人多迕

文選長笛賦注引魏書程昱傳云昱於魏武前忿爭聲氣全
高邊人搢之乃止

時校事放橫

錢大昭曰程曉以爲校事之官魏武特置然孫吳亦有校事
呂壹操弄威柄丞相以下皆畏憚之豈一時弊政彼此亦相
倣效乎 姜宸英曰校事卽明末東廠之類

以諛詞爲賢能

後漢書和熹鄧后紀云輕薄諛詞章懷注猶急遽也又本書
臧霸傳云部從事諛詞不法

於是遂罷校事官

何焯曰罷之誠是也然當時實以師方擅朝不欲有諛詞之
人故曉言得伸耳

注 曉別傳曰曉大著文章多亡失今之存者不能十分之一
殿本考證云宋本一作二 隋書經籍志有魏汝南太守程

三
二
曉集二卷

郭嘉
傳 潁川陽翟人也

洪亮吉曰河南尹本秦三川郡漢改今名魏領縣十二曰
陽翟漢舊縣屬潁川宋志魏晉屬河南

表爲司空軍祭酒

趙一清曰建安三年初置軍師祭酒見武紀此無師字省文
也

注 此存亡之機不可失也

殿本考證云不可失也北宋本作不可不測也

又 又本傳稱自嘉料孫策輕佻

殿本考證云宋本自作臣

冀州平封嘉洧陽亭侯

沈欽韓曰水經注洧水自大穴口東南逕洧陽城俗謂之復陽城非也蓋洧復字類音變耳漢建安中封郭奉孝爲侯國一統志云洧陽城在陳州府扶溝縣南

後太祖征荆還於巴邱遇疾疫燒船

水經湘水注云湘水至巴邱山入江山在湘水右岸山有巴陵故城是也又洞庭湖亦曰巴邱湖括地志巴邱湖中有曹公洲卽孟德爲孫權所敗燒船處

三國志旁證卷十二終

三國志旁證卷十三

閩長樂梁章鉅撰

董昭
傳 董昭字公仁

沈欽韓曰晉諱昭故改昭字爲照或爲曜隸釋魏公卿上尊號奏碑將作大匠千秋亭侯臣照卽董昭也碑旣追改爲照又吳之韋曜旣改去原名昭字則陳壽作此傳無容不諱矣蓋裴松之所追改而偶未及韋曜耳

使昭領鉅鹿

錢大昭曰以下文紹以昭領魏郡太守例之則鉅鹿下當有太守二字

昭欲詣漢獻帝至河內爲張楊所留

李龍官曰此時不應稱獻帝獻疑爲見字之譌

三國志卷之二十三
因敵取資事必克捷若其無臣不須爲念

按無臣當作無成

進爵樂平侯邑千戶轉衛尉

太平御覽卷四百八十八引語林云董昭爲魏武重臣後失勢文明世入爲衛尉昭乃厚加意於侏儒正朝大會侏儒作董衛尉啼面言昔太祖時事舉坐大笑明帝悵然不怡月中爲司徒

劉曄傳淮南成惠人也注惠音德

顧祖禹曰成德城在鳳陽府霍邱縣東南 一統志在壽州之東南

上繚宗民數欺下國 又上繚雖小城堅池深

水經贛水注繚水東逕新吳縣又逕海昏縣謂之上繚水又

謂之海昏江 顧祖禹曰上繚營在南康府建昌縣南十七里相傳昌邑王賀所築 按此宗民亦竇賊卽山越也

明公以步卒五千將誅董卓

錢大昭曰武帝紀中平六年十一月始起兵于已吾裴注引郭頒世語云陳留孝廉衛茲以家財資太祖使起兵衆有五千此云步卒五千蓋指初起兵言之或謂記述者欲以少見奇非其實錄斯不然矣

因難求臣必難信也

殿本考證云必宋本作心

注諺曰巧詐不如拙誠

說苑談叢云智而用私不如愚而用公故曰巧詐不如拙誠

蔣濟傳楚國平阿人也

沈欽韓曰楚王彪傳國除爲淮南郡是明帝世九江郡固稱
楚國也陳壽於諸傳或稱九江或稱淮南或稱楚國自亂其
例顧祖禹曰平阿城在鳳陽府懷遠縣北三十里懷遠縣
志平阿山在縣西南六十里漢平阿縣因山爲名
拜濟丹陽太守

趙一清曰丹陽已屬吳而拜濟丹陽太守蓋遙奪其地也

太祖聞之指前令與左將軍于禁沛相封仁等曰

盧明楷曰各本作指有令按此蓋操謂蔣濟無謀叛之事而
信前令之不虛作前令爲是

太祖以漢帝在許近賊欲徙都

錢大昭曰時欲徙河北見晉書宣帝紀

車駕幸廣陵濟表水道難通又上三州論以諷帝

水經淮水注引蔣濟三州論云淮湖紆遠水陸異路山陽不通陳敏穿溝更鑿白馬瀨百里渡湖 何焯曰三州者本詩人淮有三洲之義言水淺也

車駕卽發還到精湖水稍盡

顧祖禹曰津湖在寶應縣六十里東通運河西北接汜光湖南入高郵州界或曰卽精湖蔣濟鑿地聚船遏湖水灌之入淮卽此處也

吾前決謂分卒燒船於山陽池中

何焯曰分當作扶問切自料大半如此也通鑑注作分半船誤 潘眉曰上有決謂二字卽自料之詞又讀分作扶問切於義爲複讀平聲者是 按各本作分半燒船今 殿本作分卒燒船義甚了然無庸辨分之平仄讀也

注太和六年明帝遣平州刺史田豫乘海渡

景初二年滅公孫淵始以遼東昌黎帶方元菟樂浪五郡爲平州後合爲幽州不應太和六年已有平州刺史且豫是時爲護烏丸校尉持節屯昌平亦不爲平州刺史也

景初中外勤征役內務宮室濟上疏曰今雖有十二州至於民數不過漢時一大郡

王鳴盛曰陳羣傳青龍中營治宮室百姓失農時羣上疏曰今喪亂之後人民至少比漢文景之時不過一大郡與濟言正同彼文下臣松之按漢地理志云元始二年天下戶口最盛汝南郡爲大郡有三十餘萬戶則文景時不能如是之多也晉太康三年地記晉戶有三百七十七萬吳蜀戶不能居半以此言之魏雖始承喪亂方晉亦當無大殊陳羣之言於

是爲過再考杜畿子恕傳太和中恕上疏曰今大魏奄有十州之地而承喪亂之弊計其戶口不如往昔一州之民今考明帝卽位建元太和七年改青龍青龍五年改景初倘如松之言以陳羣爲過則蔣濟亦過也杜恕近之然亦甚其詞矣又曰南齊竟陵王子良密啟武帝論民戶疲耗有曰以魏方漢猶一郡之譬見蕭子顯南齊書本傳然則蔣濟陳羣之言從來相傳如此何得云魏始承喪亂時與晉無大殊又南史齊東昏紀張欣泰謂裴長穆曰以秦之富今不及秦一郡南朝旣不及秦一郡則魏初只可及漢一郡可知潘眉曰攷魏據中原戶六十六萬三千四百二十三口四百四十三萬二千八百八十一耳漢時郡國志所載如汝南戶四十萬四千四百四十八口二百一十萬七百八十八南陽戶五十

二萬八千五百五十一口二百四十三萬九千六百一十八
豫章戶四十萬六千四百九十六口百六十六萬八千九百
六漢時一大郡戶至四五十餘萬今以全魏十二州僅戶六
十六萬故曰不過漢時一大郡
弊敝之民

盧明楷曰敝毛本作勑按勑音貴力乏也敝音溪險也似應
作勑又顏氏書證篇曰勑卽敝倦之敝或者敝其敝字之訛
歟按何焯曰勑居胃切是從勑潘眉曰敝九僞反見廣雅
及陳思王集是從敝沈欽韓曰說文勑尤極也玉篇枯勒切
此作支旁蓋訛是又謂勑應作勑也

初侍中高堂隆論郊祀事以魏爲舜後推舜配天
通典高堂隆表云案古典可以武帝配天魚豢議昔后稷以

功配天漢出自堯不以堯配天明不紹也且舜已越數代武
皇肇創洪業宜以配天 秦蕙田曰通典言高堂隆表與蔣
濟傳不合不知何據豈武帝二字本作虞舜而刻本誤歟魚
豢議亦不見正史豢作魏略恐是著撰私議非當官議禮之
詞也

劉放

涿郡人漢廣陽順王子西鄉侯宏後也

按本傳云景初二年遼東平定以參謀之功各進爵封本縣
放方城侯資中都侯然則放當云涿郡方城人 又按漢書
王子侯表有西鄉侯容廣陽頃王子順當作頃宏當作容且
放子名宏西鄉雖遠祖亦不當同名則宏字之誤益明

注

天下騷動

毛本騷動誤作要動明監本又作搔動今 殿本已改正

抑辛毗而助王思

錢大昭曰王思事見梁習傳魏略入之苛吏

注晉陽秋曰楚子洵潁川太守

潘眉曰晉書孫楚傳言洵未仕早終惟孫盛傳言父洵潁川太守與裴注同當是孫楚傳誤也

劉馥傳太祖悅之辟爲司徒掾

趙一清曰一本作司徒辟爲掾非也曹公時爲司空而令三府辟之

後孫策所置廬江太守李述

殿本考證云吳志述作術

興治芍陂及茹陂七門吳塘諸埭

殿本考證云太平御覽茹陂作茄陂 太平寰宇記卷百二

十七云茹陂在光州固始縣東南四十八里劉馥興築以水溉田 又卷百二十六云七門堰在廬州廬江縣南百一十里劉馥爲州刺史修築斷龍舒水灌田千五百頃 劉敞七門廟記云嘉祐二年予爲廬州從事始以事至舒城觀所謂七門三堰者問於居人其田溉幾何曰二萬頃考於圖書則漢羹頡侯信始基而魏揚州刺史劉馥實修其廢 又太平寰宇記卷百二十五云吳陂塘在舒州懷甯縣西二十里有吳陂祠劉馥開吳陂以溉稻田功利及人里人以鵞山廟在陂側因指名以祀焉

時天連雨城欲崩於是以苦蓑覆之

公羊傳定公元年傳云仲幾之罪何不蓑城也何休注云若今以艸衣城也是以苦蓑覆城之法自古有之

自黃初以來崇立太學二十餘年而寡有成者蓋由博士選輕諸生避役高門弟子恥非其倫故夫學者雖有其名而無其人雖設其教而無其功

錢大昭曰典略儒宗傳敘云太和青龍中中外多事人懷避就雖性非解學多求詣太學太學諸生有千數而諸博士率皆麤疏無以教弟子弟子本以避役竟無能習學冬來春去歲歲如是學校如此廢弛已極劉靖所以有此疏也 殿本考證云冊府元龜引無其人作無其實

又修廣戾渠陵大塢水溉灌薊南北三更種稻邊民利之

何焯曰水經注作戾陵塢車箱渠據此當作戾陵渠爲是潘眉曰水經注劉靖以嘉平二年造戾陵塢開車箱渠塢表云高一丈東西長三十丈南北廣七十餘步其地名戾陵堰

以有燕刺王旦之陵故以戾陵名堰戾陵乃地名傳言戾渠陵當作戾陵渠文誤倒耳修廣戾陵渠大竭與碑稱戾陵竭之文合大竭猶陸抗傳大堰諸葛恪傳大堤也 水經鮑邱水注載劉靖碑文云魏使持節都督河北道諸軍事征北將軍建城鄉侯沛國劉靖字文恭登梁山以觀源流相漂水以度形勢嘉武安之通渠羨秦民之殷富乃使帳下丁鴻督軍士千人以嘉平二年立遏于水導高粱河造戾陵遏開車箱渠其遏表云高粱河水者出自并州潞河之別源時長岸峻固直截中流積石籠以爲主遏高一丈東西長三十丈南北廣七十餘步依北岸立水門門廣四丈立水遏長十丈山水暴發則乘遏東下平流守常則自門北入灌田歲二千頃凡所封地百餘萬畊至景元三年辛酉詔書以民食轉廣陸費

不贍遣謁者樊晨更制水門限田千頃刻地四千三百一十六頃出給郡縣改定田五千九百三十頃水流乘車箱渠自薊西北逕昌平東盡漁陽潞縣凡所潤合四五百里所灌田萬有餘頃高下孔濟原隰底平疏之斯溉決之斯散導渠口以爲濤門洒漉池以爲甘澤施加于當時敷被于後世晉元康四年君少子驍騎將軍平鄉侯宏受命使持節監幽州諸軍事領護烏丸校尉甯朔將軍遏立積三十六載至五年夏六月洪水暴出毀損四分之三剩北岸七十餘丈上渠車箱所在漫溢追惟前立遏之勳親臨山川指授規略命司馬關內侯逢暉內外將士二千人起長岸立石渠修主遏治水門門廣四丈立水過五尺興復載利通塞之宜準遵舊制凡用功四萬有餘焉諸部王侯不召而自至襁負而趨事者蓋數

千人詩載經始勿亟易稱民忘其勞斯之謂乎於是二府文武之士感秦國思鄭渠之績魏人置豹祀之義乃遐慕仁政追述成功元康五年十月十一日刊石立表以紀勲烈並記過制度永爲後式焉

注晉陽秋曰劉宏字叔和熙之弟也

隋書經籍志有晉陽秋三十二卷孫盛撰訖哀帝 趙一清曰水經沔水注宏字季和晉書列傳亦作字季和未知孰是又宏與晉世祖同年居同里

錢大昭曰晉武帝河內溫人劉宏沛國相人此云居同里者謂同居雒陽之永安里也

又吾統荊州十郡安得十女壻然後爲治哉

錢大昭曰郡國志荊州七郡此多二郡疑爲魏興新城上庸

耳

司馬朗傳字伯達河內溫人也注朗祖父雋字元異

晉書宣帝紀云周以夏官爲司馬其後程伯休父周宣王時以世官克平徐方錫以官族因而爲氏楚漢間司馬卽爲殷王都河內漢以其地爲郡子孫遂家焉自卬八世生征西將軍鈞字叔平鈞生豫奉太守量字公度度生潁川太守雋潘眉曰朗與司馬芝爲族兄弟見楊俊傳前芝傳已書河內溫人則朗傳但書支系足矣如夏侯尚傳書淵從子荀攸傳書或從子袁紹傳書紹從弟皆是其鍾會賀邵傳與此同病范史袁紹袁術兩書汝南汝陽人亦非也

又有子八人朗最長次卽晉宣皇帝也

晉書安平獻王孚傳云孚字叔達宣帝次弟長兄朗字伯達

宣帝字仲達字弟廌字季達恂字顯達進字惠達通字雅達敏字幼達俱知名故時號爲八達廌魏魯相東武成侯恂魏鴻臚丞進魏中郎通魏司隸從事安城亭侯惟敏不見史傳黎陽有營兵

顧祖禹曰後漢有黎陽營漢官儀云中興以幽冀并州兵平定天下故於黎陽立營兵鋒嘗爲天下冠

雖在軍旅常麤衣惡食
麤太平御覽作惡

卒時年四十七

潘眉曰太祖以建安元年拜司空辟爲司空掾時朗年二十二至建安二十二年卒止有四十三歲傳誤

朗弟孚

晉書司馬孚傳云孚以貞白自立高貴鄉公遭害百官莫敢
奔赴孚枕尸於股哭之慟曰殺陛下者臣之罪奏推主者及
武帝受禪陳留王就金墉城孚拜辭執王手流涕獻歎不能
自勝曰臣死之日固大魏之純臣也臨終遺令曰有魏貞士
河內溫縣司馬孚不伊不周不夷不惠立身行道終始若一
當以素棺單槨歛以時服薨時年九十三王應麟曰司馬孚
自謂貞士孚上不如魯叔盼下不如朱全昱謂之貞士可乎

注

咨字君初子鄴字子晉驃騎將軍

又

並見百官名志

字

隋書經籍志有魏晉百官五卷

梁習

太祖爲司空辟召爲漳長

後漢書郡國志東平國有章縣此漳字恐誤

累轉乘氏海西下邳令

趙一清曰習爲海西令爲亂民所逐賴徐宣以免此傳諱之胡狄在界張雄跋扈

何焯曰張雄當作雄張倉慈傳亦有大姓雄張之文

文帝踐阼復置并州

潘眉曰并州建安十八年省入冀州二十年新立新興樂平二郡至黃初元年復置并州領漢舊郡四新郡二

張旣傳注旣世單家富

富字衍此引魏畧語下文始言家富自惟門寒也

又與夏侯淵宋建別攻臨洮狄道平之

陳景雲曰淵下疑脫討字 按夏侯淵傳云初抱罕宋建自稱河首平漢王太祖遣夏侯淵率諸將討之屠抱罕斬建旣

卽諸將之一與夏侯淵同討宋建旣又別攻臨洮狄道耳

酒泉蘇衡反與羌豪鄒戴及丁令胡萬餘騎攻邊縣旣與夏侯

儒擊破之

注

儒初爲鄢陵侯彰驍騎司馬宣王爲征南將軍都

督荆豫州正始二年朱然圍樊城儒進屯鄧寨以兵少不敢進
召還爲太僕

陳景雲曰驍騎司馬句絕鄢陵北征以北中郎將行驍騎將
軍時儒從兄尙爲長史儒則爲司馬從征也宣王二字有誤
爲征南上兼有脫文宣王嘗以驃騎將軍都督荆豫不在四
征之列蓋爲征南都督荆豫者卽儒也以下文樊城受圍儒
坐遲救召還事觀之義自明矣 按魏志夏侯傳北郡胡
叛遣鄢陵侯彰討之以尙參彰軍事也又任城威王彰傳建
安二十一年封鄢陵侯二十三年代郡烏桓反以彰爲北中

郎將行驍騎將軍明帝紀太和元年新城太守孟達反詔驃騎將軍司馬宣王討之三少帝紀正始二年吳將朱然等圍襄陽之樊城太傅司馬宣王率衆拒之退云云並足證是注所引魏畧之有訛脫

注試呼相者相之

何焯曰者字宋本作工

又何材如是而位至二千石乎

殿本考證云尋翫文義至當作止

溫恢傳入爲丞相主簿

趙一清曰據孫禮傳恢曾任刺奸主簿

今水生而子孝縣軍無有遠備

潘眉曰曹仁字子孝時行征南將軍

賈逵傳 賈逵字梁道河東襄陵人也

拾遺記云賈逵五歲明惠過人其姊聞鄰讀書旦夕抱逵隔籬聽之至十歲乃暗誦六經姊曰吾家貧困未嘗有教者入門汝安知有三墳五典而誦無遺句耶逵曰憶昔姊抱聽鄰家讀書今萬不遺一乃剝庭中桑皮爲牒或題扉屏且誦且記期年經文通徧閭里每有觀者稱云振古無倫門徒來學不遠萬里或襁負子孫舍於門側皆口授經文贈獻者積粟盈倉或云賈逵非力耕所得誦經口倦世所謂筆耕也

左右義逵多爲請遂得免

趙一清曰集古錄賈逵碑跋云裴注引魏畧與志不同而此碑但云爲援所執臨以白刃不屈而已不載絳人約援事如傳所載不獨逵有德於絳人而絳人臨危能與逵生死亦可

謂賢矣自古碑碣稱述功德常患過實如達與絳人德義碑不應畧而不著頗疑陳壽作傳好奇而所得非實也松之又注魏書達年五十五而碑云五十有四亦當以碑爲正

注取造意者又謂獄吏曰

太平御覽卷四百五十三引取上有教字謂上有達字

達曰州本以御史出監諸郡以六條詔書察諸郡長吏二千石已下

潘眉曰御史當爲刺史此傳寫誤也秦置監御史掌監郡秦之御史卽漢之刺史賈逵言六條詔書察諸郡長吏是言漢制不應以漢世之法屬諸先秦之官知今本作御史者非也六條詔書漢武所制賈逵爲豫州刺史攷其時在延康元年尙承用六條之法也

過鄆汝造新陂又斷山溜長谿水造小弋陽陂又通運渠二百餘里所謂賈侯渠者也

水經渠水注云沙水又南與廣漕渠合上承龐官陂云鄧艾所開雖水流廢與溝瀆尙夥昔賈逵爲魏豫州刺史通運渠二百餘里謂賈侯渠也而川渠逕復交錯畛陌無以辨之進封陽里亭侯

水經瓠子河注云瓠子北有都關縣故城縣有羊里亭黃初中賈逵封爲羊里亭侯邑四百戶卽此亭也陽羊古字通國家征伐亦由淮沔

殿本考證云太平御覽淮沔作淮沛

五將山

續後漢書音義云在淮沔之間晉載記符堅兵敗奔五將山

按堅都長安倉卒安得至淮汙漢書地理志左馮翊谷縣有五牀山當是堅所奔也

吏民追思之爲刻石立祠

水經潁水注云谷水逕小城北又東逕賈逵祠北廟在小城東廟前有碑碑石生金千寶曰黃金可採爲晉中興之瑞

太平寰宇記卷十云賈逵碑在陳州項城縣東南二里梁國劉舉等立 太平廣記卷二百九十二引賈逵碑云賈逵在豫郡亡家迎喪去去後恒見形於項城吏民以其戀慕彼境因以立廟廟前有柏樹有人竊來斫伐始投斧及仍著於樹中所著處尋更生項城左右人莫不振怖

注晉諸公贊曰充字公間 又諡曰武公

晉書賈充傳云達晚始生充言後當有充間之慶故以爲名

三國志卷之十三
字又云博士秦秀議諡曰荒帝不納博士段暢希旨建議諡武帝從之秦始中謠曰賈裴王亂紀綱王裴賈濟天下言亡魏而成晉也

又孚爲諸生嘗種薤欲以成計

潘眉曰言欲俟其成以計知其多寡也

又及到梁淇

後漢書郡國志魏郡梁期卽梁淇也 水經濁漳水注云漳水又東逕武城南世謂之梁期城在鄴北俗亦謂之兩期城皆非也

注後占河南夕陽亭部

潘眉曰亭在女几山之陽故曰几陽此作夕陽亭誤

任峻傳 字伯達

太平御覽卷二百四十一引作字伯遠

太祖以峻爲典農中郎將數年中所在積粟倉廩皆滿

太平御覽卷三百三十三引中郎將下有募百姓屯田於許下得穀百萬斛郡國列置官田十九字按此與晉書食貨志文同 顧祖禹曰洧倉城在許州故城東卽洧水之邸閣也棗祇募人屯田許下此其倉城也又臨潁縣北二十里有棗祇河或謂之棗村河縣西二十里有灌溝北接潁水南接泥河南北二口俱有陡門亦曹縣時引水溉田處

太祖使峻典軍器糧運賊數寇鈔絕糧道乃使千乘爲一部十道方行爲複陳以營衛之賊不敢近

按通典卷一百三十七載李衛公兵法云諸軍討伐例有數營發引逢賊首尾難救行引之時須先爲方陣應行之兵分

爲四分輜重爲兩道引戰鋒等隊亦爲兩道引如此發引縱使狹路急緩亦得成陣卽祖此制也

遷長水校尉

後漢書百官志云長水校尉一人比二千石掌宿衛兵注引韋昭曰長水校尉典胡騎廩近長水故以爲名長水蓋關中之小水也

蘇則傳注與焉翊吉茂隱於郡南太白山中

後漢書郡國志云右扶風武功太一山古文以爲終南水經渭水注云太壹山亦曰太白山在武功縣南去長安二百里不知其高幾何俗云武功太白去天三百

初則及臨菑侯植聞魏氏代漢皆發服悲哭注孫盛曰夫士不事其所非不非其所事則旣策名新朝委質異代而方懷二心

豈大雅君子去就之分哉

唐庚曰魏氏受禪漢帝尙存縞素舉哀誠爲輕脫然孫盛以爲二心茲又過矣箕子過商故墟傷之欲哭以方朝而不敢季札哭王僚而事闔廬晏子哭莊公而事景公哀死事生以待天命此人臣之分也何得謂之非其所事而事其所非乎槎桎拔失鹿

沈欽韓曰蓋竹木格圈鹿者 庶物異名疏槎桎檻獸之具子怡嗣

唐書宰相世系表怡作恬

注石崇妻紹之兄女也

殿本考證云兄女宋本作女兄 按世說賞譽篇亦云紹是石崇姊夫蘇則孫愉子也

杜畿傳太祖以畿爲司空司直

沈欽韓曰漢書百官表武帝元狩五年初置司直秩比二千石掌佐丞相舉不法續志建武十一年罷司直官按漢末建安八年復置司直督中都官是時曹操雖爲司空實專一相故司空有司直也

固等使兵數千人絕陝津畿至不得渡

趙一清曰陝津卽茅津亦謂之大陽津在陝州西北三里後漢書郡國志河東郡大陽有茅津是也

或謂畿曰宜須大兵

陳景雲曰或當作或畿移守河東雖由荀彧之薦而是時畿在陝津或在許下不得參預軍謀殆因前荀彧字而誤

遂詭道從郛津渡

潘眉曰邵津在宏農見許氏說文漢武故事作竇津穆天子傳作涇津

注昨日功曹今爲郡將軍也

殿本考證云軍字疑衍

會白騎攻東垣高幹入漢澤

何焯曰龐德傳云張白騎叛于宏農白騎卽上張晟耶按後漢書朱雋傳自黃巾賊後復有張白騎之徒並起山谷騎白馬者爲張白騎 漢書地理志河東郡垣漢澤後漢書郡國志垣有王屋山注史記曰魏武侯二年城王垣博物志云山在東狀如垣據此傳則漢末亦稱垣爲東垣矣

漸課民畜犝牛草馬

潘眉曰郭璞注爾雅牝馬爲草馬顏師古匡謬正俗牡馬壯

健堪駕乘及軍戎者皆伏皁櫪芻而養之其牝馬唯充蕃字不暇服役常牧於草故稱草馬

受詔作御樓船於陶河

通典州郡七云河陽古孟津後亦曰富平津在其南謂之陶河漕按下詔明言杜畿於孟津試船遂至覆沒也

杜恕傳今可勿令領兵以專民事

潘眉曰魏世州郡領兵之制創議於司馬朗朗以郡國無蒐狩習戰之備致使天下有土崩之勢因議欲令州郡並置兵以外備四夷內威不軌至是杜恕欲令州郡勿領兵以安民豐財二人之論皆揆時度勢經國之要也蓋朗之議建於建安之初而恕之論發於太和以後所值不同故所規亦異然恕以爲可勿領兵者惟兗豫同冀而已其餘皆不能廢兵蓋

青徐荆楊與吳接壤幽并近匈奴雍涼近蜀緣邊諸境尙未能克靖也

計所置吏士之費與兼官無覺

殿本考證云覺宋本作異

雖才且無益

何焯曰才且二字宋本作文具

閱七聖而課試之文不垂

殿本考證云監本閱誤關今照冊府元龜改

殛鯨而放四凶

趙一清曰以鯨不在四凶之列與先儒說異

注三人皆恕之同班友善

殿本考證云監本三人誤作二人今改正

樂安廉昭以才能拔擢頗好言事

殿本考證云宋本無言字

昔漢安帝時少府竇嘉辟廷尉郭躬無罪之兄子

按安帝當作和帝見後漢書竇融傳郭躬爲廷尉卒於和帝
永元六年亦不及安帝時也

注以孟康代恕爲宏農

邵晉涵曰此孟康卽注漢書者顏師古曰安平廣宗人

又康旣無才敏因在冗官博讀書傳

殿本考證云宋本作康旣才敏無無字

起家爲河東太守

晉書劉毅傳云僑居平陽太守杜恕請爲功曹沙汰郡吏百
餘人三魏稱焉爲之語曰但聞劉功曹不聞杜府君按平陽

縣屬河東正始八年始別置郡是時尚未也

俱自薄廷尉

趙一清曰薄當作簿謂對簿也

在章武遂著體論八篇

隋書經籍志有杜氏體論四卷又篤論四卷杜恕撰

卒於徙所

通典州郡七云河南福昌縣北有魏杜畿杜恕墓

注

樂詳字文載少好學建安初詳聞公車司馬令南郡謝該善

左氏傳乃從南陽步詣該問疑難諸要

殿本考證云後漢書注步詣該作步涉許從該 後漢書儒

林傳云謝該字文儀南陽章陵人善明春秋左氏爲世名儒
門徒數百千人建安中河東人樂詳條左氏疑滯數十事以

問該皆爲通解之名爲謝氏釋行於世仕爲公車司馬令以父母老託疾去官歸鄉里會荊州道斷不得去少府孔融上書薦之詔卽徵還拜議郎以壽終

注弟寬字務叔

李龍官曰弟寬監本作子寬按恕字務伯理字務仲寬字務叔皆兄弟也韓愈杜中散墓誌亦云畿季子寬可知子字爲弟字之誤

又預從兄斌

殿本考證云斌宋本作武

鄭傳渾渾兄泰與荀攸等謀誅董卓注又與王允謀共誅卓

殿本考證云後漢書作與何禹荀攸共謀誅卓

重去子之法民初畏罪後稍豐給無不舉贍所育男女多以鄭

爲字

潘眉曰零陵先賢傳云漢末多事國用不足產子一歲輒出口錢民多不舉子蓋是時民窮財盡懼出口錢因不舉子鄭渾先課耕桑開稻田令其豐給無不舉育法之善者也

晉將夏陽長邵陵令并其吏民入磴山

何焯曰渾爲司隸部左馮翊夏陽乃其屬城若邵陵則屬汝南郡爲豫州刺史部內與左馮翊無涉此因前有渾爲邵陵令之文而誤耳其地當去夏陽不遠或邵陽之誤

以子崇爲郎中

趙一清曰宋書鄭鮮之傳高祖渾魏將作大匠曾祖襲大司農南史同豈崇有二名耶

倉慈傳慈躬往省閱料簡輕重

殿本考證云太平御覽料簡作斟酌

欲詣洛者爲封過所

後漢書光武紀云煩擾道上疲費過所 古今注云凡傳皆

以木爲之長五寸書符信於上又以一板封之皆封以御史
印章所以爲信也如令之過所也 按過所若今之路文引

注
不曉作樓犁

齊民要術云漢趙過教民耕殖其法三犁共一牛一人將之
下種挽耬皆取備焉日種一頃耬車者下種具也狀如三足
犁中置耬斗藏種以牛駕之一人執之且行且搖種乃隨下
然則樓當作耬燉煌人不曉作耬犁故下種功力甚費也

魏郡太守陳國吳瓘

殿本考證云太平御覽瓘作瓘

注 又課民無牛者令畜豬狗賣以買牛

殿本考證云太平御覽作令畜豬貴時賣以買牛

又 常爲雍州十郡最

錢大昭曰雍州獻帝時置卽司隸所部七郡後雖有分置顏斐時當仍舊制十疑當作七

又 到武安毛城中

殿本考證云太平御覽武安作安邑

又 曾祖疇字元矩陳相漢桓帝立老子廟於苦縣之賴鄉畫孔子像於壁疇爲陳相立孔子碑於像前今見存

水經陰溝水注云澗水北逕老子廟東廟前有二碑在南門外漢桓帝遣宦官管霸祠老子命陳相邊韶撰碑北有雙石闕闕北東側有孔子廟廟前有一碑西面是陳相魯國孔疇

建和三年立

經論治體

論宋本作綸 張照曰經綸本易屯蒙傳而古本易有作經論者是綸亦可作論也

張遼傳本聶壹之後

潘眉曰聶壹見漢書匈奴傳

陳蘭梅成以氏六縣叛

陳景雲曰氏當作瀾縣欽征天山賦爲遼平蘭成而作其詞云羣舒蠢動割有瀾六斯其證也蘭成初叛本分據二邑繼乃并兵於瀾此傳所載與縣賦皆合 按通鑑亦作瀾六瀾六二縣皆屬廬江郡

遼督張郃朱蓋等討蘭

殿本考證云宋本朱作牛

此所謂一與一

此用襄二十五年傳齊申鮮虞語

斬藹成首盡虜其衆

侯康曰此傳不載此事年月通鑑繫之建安十四年繇欽征天山賦作建安十四年十二月甲辰也

遼復還突圍拔出餘衆

太平御覽卷二百七十九引魏畧云張遼爲孫權所圍遼潰圍出復入權衆破走由是威震江東兒啼不肯止其父母以遼恐之

注是以魏武推選方員

殿本考證云太平御覽作是以魏武雜選武力

孫權復稱藩遼還屯雍邱得疾帝遣侍中劉煜將太醫視疾
宋書禮志云漢三公病遣中黃門問病魏晉則黃門郎尤重
者或侍中遼位未至公而遣侍中蓋寵之也

疾小差還屯孫權復叛

趙一清曰權無再服再叛之事前後疊出史家贗詞陳承祚
亦刊落不盡耳

樂進傳陽平衛國人也

錢大昕曰衛國漢屬東郡建安十七年割衛國益魏郡尋分
魏郡爲東西部衛當在東部管內黃初二年以魏之東部爲
陽平郡故衛國屬陽平也晉志衛屬頓邱頓邱卽故東郡所
分魏晉之際郡縣改隸無常如此

遣進李典擊之

殿本考證云宋本遺進下多與字

于禁傳 禁與其黨俱詣爲都伯

按通典兵二魏武軍令伍長有不進者什長殺之什長有不進者都伯殺之是都伯者卽隊長

使將兵詣徐州攻廣威拔之

後漢書郡國志彭城國廣戚故屬沛此戚字是戚字之誤
邵等夜襲太祖營禁率麾下擊破之斬辟邵等盡降其衆

趙一清曰此傳之誤與武紀同曹公破辟邵在建安元年而五年又云汝南降賊劉辟叛則此時邵死而辟降可知不得斬也

使禁將守延津以拒紹

太平寰宇記卷五十六引左傳廩延注云汲郡城有延津城

于禁守延津以拒袁紹卽此城也

注區區小國猶尙若斯

殿本考證云宋本作尙猶若斯

張郃傳郃與夏侯淵等守漢中拒劉備又備於走馬谷燒都圍淵

救火從他道與備相遇交戰短兵接又淵遂沒郃還陽平

太平御覽卷三百三十七引魏武軍令曰夏侯淵今月賊燒却鹿角鹿角去本營十五里淵將四百兵行鹿角因使士補之賊山上望見從谷中卒出淵使兵與鬪賊遂繞出其後兵退而淵未至甚可傷淵本非能用兵也軍中呼爲白地將軍爲督師尙不當親戰况補鹿角乎

追至祁口交戰破之

祁口卽汴口小經沔水注云沔水下注汴水上通梁州沔陽

縣東逕新城之汴鄉謂之汴水又東歷宜城西山謂之汴谿東合流於夷水謂之汴口宋書州郡志新城太守領祁陽令魏立晉太康地志作汴音祁則魏晉間固有稱祁口者矣亮還保祁山郤追至木門與亮軍交戰飛矢中郤右膝死

太平御覽卷二百九十一引漢末傳云亮糧盡軍還至於青封木門郤追之亮駐軍削大樹皮題曰張郤死此樹下豫合兵夾道以數十强弩備之郤果見字于弩俱發而死

徐晃傳

擊袁紹運車於故市功最多封都亭侯

姜宸英曰前已書封都亭侯此又封殆以前封非出操耶十五年討太原反者圍太陵拔之

錢大昭曰此事武帝紀在十六年夏侯淵傳在十七年之前此五字疑誤

使晃與夏侯淵平郫夏陽餘賊

錢大昭曰郫當從夏侯淵傳作鄠

絕馬鳴閣道

潘眉曰太平寰宇記馬鳴閣在利州招化縣卽褒斜棧道也諸葛武侯與兄瑾書赤崖以北閣道緣谷一百里其閣梁一頭入山腹一頭立柱於水中又云頃大水暴出赤崖以南橋閣悉壞其地卽馬鳴閣道

士不暇食

太平御覽卷七百五十七引魏畧云徐晃性嚴驅使戰士不得閒息於時軍中爲之語曰不得餉屬徐晃晃聞此語笑曰我搥破汝鎬鎬耶

至後將軍封高唐亭侯

按本節下注引魏書云文帝卽位封靈卹侯靈謝曰高唐宿所願於是更封高唐侯乃縣侯也是亭字宜衍

李典傳遷離狐太守

錢大昕曰離狐縣前漢屬東郡後漢屬濟陰郡離狐城在單縣西史無置郡之文蓋建安初暫置而卽罷耳 按據此傳則魏時離狐又嘗置郡矣

吾不可以私憾而忘公義乎

姜宸英曰不字衍

李通傳封建功侯分汝南二縣以通爲陽安都尉

錢大昕曰陳氏景雲疑建功下脫亭字予謂建功侯卽魏武所置名號之一也 又曰魏略稱通領陽安太守蓋以都尉行太守事也趙儼傳袁紹遣使招誘諸郡惟陽安郡不動蓋

當時都尉別領縣者亦稱郡矣

朗陵長趙儼收治

錢大昕曰漢制大縣置令小縣置長此與趙儼傳稱朗陵長而田豫傳稱除朗陵令當有一誤

汪王隱晉書曰秉嘗得司馬文王問因以爲家誠曰昔侍坐於先帝時有三長史俱見臨辭出上曰爲官長當清當慎當勤脩此三者何患不治乎

按清慎勤三字箴不可以人廢也今人以爲出宋儒呂本中失之矣

清者不必慎慎者不必清

潘眉曰下句當依汲古閣本作慎者必自清 按今 殿本已改正

臧霸傳 泰山華人也

錢大昕曰漢志泰山郡有華縣續漢志無之方輿紀要以爲併入費縣按魏志明稱臧霸泰山華人泰山都尉孔宙碑亦有題泰山華者然則後漢元有華縣殆自并未久而復置耳按洪亮吉補三國疆域志泰山郡領縣十一並無華縣是其疏也

太祖以霸爲琅邪相敦利城禮東莞觀北海康城陽太守

潘眉曰利城東莞城陽皆新置郡

沛國公武周爲下邳令

朱良裘曰胡質傳注引虞預晉書云武周字伯南沛國竹邑人此公字疑衍

行遇霖雨大軍先及水遂長賊船稍進

殿本考證云太平御覽先及作先反稍進作稍近

文聘傳

乃以聘爲江夏太守

趙一清曰吳魏並立江夏郡吳江夏郡治沙羨孫權以程普領太守魏以文聘領太守屯石陽

與樂進討關公於尋口

顧祖禹曰潯水城在蘄州東潯陽記謂之蘭池城古潯陽也尋口潯水入江之口卽九江口也今江西九江府德化縣潯陽城蓋六朝時改置非漢縣之舊矣

使聘別屯沔口止石梵

顧祖禹曰石陽城在黃州府黃陂縣西二十二里亦名石梵與沔口相近

呂虔傳

襄陵校尉杜松

趙一清曰襄陵字誤當作襄賁兩漢志東海郡襄賁縣賁音肥時昌稀作亂於東海故炅母得與稀通若河東之襄陵與陳留襄邑之亦名襄陵者皆去東海甚遠陵字爲誤無疑請琅邪王祥爲別駕民事一以委之世多其能任賢又討利城叛賊斬獲有功

晉書王祥傳云于時寇盜充斥祥率勵兵士頻討破之州畧清靜政化大行時人歌之曰海沂之康實賴王祥邦國不空別駕之功按晉書所謂寇盜卽此傳利城叛賊是也事在黃初六年劉知幾疑爲建安中事非

注祥脫衣將剖冰求之有少堅冰解

殿本考證云宋本有少下多頃字

許褚傳褚右手並泝船僅乃得渡

殿本考證云太平御覽泝作掉

進牟鄉侯

又

褚兄定亦以軍功封爲振威將軍

按將軍乃官號非國邑不當言封而上文進牟鄉侯當作進封蓋功下衍字正前所脫也

典韋傳

徐出取車上刀戟步出

又

將應募者數千人

殿本考證云太平御覽步出作步去千作十

以滿爲都尉賜爵關內侯

潘眉曰韋同時諸將如張遼封晉陽侯諡曰剛樂進廣昌亭侯諡曰威張郃鄭侯諡曰壯徐晃陽平侯諡曰壯李典都亭侯諡曰愍李通都亭侯諡曰剛臧霸良成侯諡曰威文聘新野侯諡曰壯許褚牟鄉侯諡曰壯龐惠關門亭侯諡曰壯韋雄武壯烈不在遼褚下乃生不封侯沒無追諡非史傳遺漏

則魏國酬庸之典爲未副焉

龐惠傳將軍董衡部曲將董超等欲降

殿本考證云董超等太平御覽作統超等

會勇烈有父風官至中衛將軍封列侯

錢大昭曰會以平寇將軍不附諸葛誕斬門突出忠壯勇烈由臨渭亭侯進爵鄉侯事見三少帝紀

龐消傳龐消字子冀酒泉表氏人也初以涼州從事守破羌長

太平御覽卷四百三十八引魏志作字子異漢書地理志

氏作是蓋古字通用也一統志云表氏故城在肅州高臺縣西又云破羌故城在西甯府碾伯縣西

遷西海太守

沈欽韓曰此西海本張掖居延屬國改爲郡也此與王莽所

置西海郡名同而地異莽郡在今青海東今西甯府邊外此在今安西州北古流沙地唐爲沙州也 按晉志西海郡故屬張掖漢獻帝興平二年武威太守張雅請置

主皇甫謐列女傳曰酒泉烈女龐娥親者表氏龐子夏之妻祿福趙君安之女也

姜宸英曰據士安作傳娥親是其名而志但云娥豈傳寫之訛或娥是女子之通稱乎 趙一清曰傳云趙君安亦與陳志不同

傳聞溫天水西城人

錢大昕曰天水無西城縣蓋卽西縣 顧祖禹曰秦州志西縣故城在秦州西南一百二十里卽所謂犬邱也非子始都此晉改爲始昌縣 按後漢書郡國志西縣屬漢陽郡晉志

晉始復漢陽爲天水郡此作天水蓋亦由後言之

欲與恭艾并勢

錢大昭曰太守馬艾已卒故功曹張恭行長史事也艾字衍何焯曰冊府元龜引本無艾字

注息又啟云左悺子弟來爲虎牙

陳浩曰上文衡弟爲京兆虎牙都尉此云左悺子弟誤當作唐衡子弟或衡悺子弟

又從樂浪南山中出

樂浪當作樂涇舊唐志肅州福祿縣武德二年於樂涇故城置福祿縣一統志云樂涇古城在肅州高臺縣北此作樂浪係筆誤

又乃攘臂結袵獨追之

殿本考證云太平御覽作獨持楯追之